

19. marts 2014

UPA 2014/139
Karl Kristian Kruse

**Erngup nukinganik isumalluutinik innaallagissionermut atorneqarnerat pillugu
Inatsisartut inatsisissaannut nr. x (qaammat) 2013-imeersumut siunnersuut.
(Avatangiisinut Pinngortitamullu Naalackersuisoq)**

Naalackersuisut erngup nukinga atorlugu nukissioqarnermut malitassamik saqqummius-saqarnerannut quttavigaavut.

Naalackersuisut inatsissamik saqqummiussinerannut Siumumiik imaattumik oqaaseqas-saagut.

Siullermik Siumumiik nuannaarutigaarput Siumup anguniartuaannagaasa ilagisaat nuna-tsinni erngup nukissiuuteqarnerup annertusartuarneqarnissaa, matumuuna annertusar-neqarnissaanut tunngavissanik ersarissunik malitassiuunneqarmat tulluartutut isigaarput.

Tassuunakkut nunatsinni mingutsitsinngittunik nukissiuuteqarnerup ineriartortitseqqinnis-saq patajaattoq qulakkeerneqassammat, Siumumiillu inoqarfiit siunissami erngup nukinga-nik innaallagissiorfeqalernissaat anguniartuarlugu sulinitinni pilersitsiniarnitsinnilu pilersit-sinermi malitassat ersarinnerusut inatsissakkut qulakkeerneqarnerat ajunngittutut pittaasu-tullu isigaarput.

Siumullu nunatsinni nunarsuarmi issittup inoqarfeqarfiini pingaaruteqarluinnartumi najuga-qarfitsinni silaannaap allanngoriartorfiani pinngittoorsinnaanngilarput ergup nukingata in-naallagassionermut annertusaassutigineqarnissaa, tassuunakkut Co2-mik aniatitsinitta annikinnerulernissaanut aqutissarissaaratta, avatangiisitta annertuumik periarfissaqar-timmasuk erngup nukinga atorlugu nukissiuternerup inersartuarnissaa.

Siumup ilisimavaa suliap naammaseqarnissaanik inatsisartut suliaqartarsimasut, taamaattumik ukiunut aggersunut nunatta sineriaani annertuumik suliffeqarfinnik pilersitsi-soqarsinnaanera, tamatumalu malitsigisaanik erngup nukinga atorlugu innaallagissiorsin-naanerit sioqqullugit malinneqartussanik nunatsinni inatsisitigut malitassaqaarnissaq Si-umup pisariaqarluinnartutut isigalugu, najoqutarineqartussatut missingiut taperserpaa.

Siumup kissaatigaa § 12 imm. 2-mi allassimasut nalilersoqqinneqassasut, tassani pine-qarput akuersisarnermi ukiut 60-it pisariaqarpallu ukiunik 20-nik sivitsorneqarsinnaasut.

Siumumiik kissaatigaarput ukiut attuuffiusinnaasut akuersissummik isumaqatigiissuteqarnermi aallaaviussasut 40-rut ilaneqarsinnaassasullu 20-nik, pisariaqavippallu kingorna aamma 20-nik ilaqqineqarsinnaallutik.

Inatsisissatut siunnersuummi Siumumit maluginiarparput nakkutiginninneq annertoq inuiaqatigiit sinnerlugit pisussaaffiuniartoq, tamannalu Siumup tugaaniik iluarisimaarparput, § 20-p iluani tamanna qularnaarneqarpoq, taamaalilluni nunatta sineriaani inuiaqatigiinnullu akornutaalersinnaanera malugineqarpat ingerlaginnaq Naalakkersuisut unitsitsisinnaallutik inuiaqatigiinnut aningaasartuutaanngittumik.

Siumumiik taamatut oqaaseqarluta intsisissatut siunnersuut Sanaartornermut Ataatsimiititaliamut ingerlatinneqassasoq innersuupparput.